



Quest'jamna semesiran varga 120 parasguladras e parasguladers als campiunadis svizzers a Mustér.

FOTO MAD

## Varga 120 en concorrenza sur Mustér

Quest'jamna han liug ils campiunadis svizzers da parasgular el contuorn da Mustér. Varga 120 pilotas e pilots semesiran, denter els era entgins che s'audan tiels megliers dil mund. L'organisaziun dil campiunadi ei danovamein els mauns dils Surselva Flaigers cull'Uniu Disentis Open.

HANS HUONDER/FMR

«Disentis Open», aschia senumna la concorrenza da parasgular che vegn arranschada quest'jamna e che vegn terminada sonda proxima. Uonn ei negin campiunadi internaziunal sil program. En concorrenza ein las meglieras Svizras ed ils megliers Svizzers. Il territori da concorrenza da parasgular el contuorn da Mustér porscha cundiziuns pretensiusas. Parasguladras e parasguladers che san nezegiar quellas, san far sgols sur liungas distanzas. Gest tenor cundiziuns dall'aura eis ei pusseivel da far da Mustér anora sgols cun distanzas d'entochen 150 km. Per quellas rela-

ziuns ei il territori lu era enconuschents lunsch entuorn.

### Ils megliers concurrenzschan

Als campiunadis svizzers da parasgular da quest'jamna ei pli u meins l'entira elita svizra dils umens dalla partida. Aschia era *Chrigel Maurer* d'Adelboden, in dils megliers parasguladers dil mund che ha gudignau siat ga la concorrenza «X-Alps». Tiels favorits s'auda era *Stephan Morgenthaler* da Staffelbach che ha gudignau gia quater ga il campiunadi svizzer. Als campiunadis mundials da quest onn eis el daventaus endischavel. Bunas schanzas da laschar encorunar sco campions svizzers han era ils dus concurrents

internazional *Tim Bollinger* da Nods e *Michael Maurer* da Frutigen. Omisus ein gia campions svizzers, Tim Bollinger ei schizun il defensur il tetel. Sco quei ch'ils organisaturs scrivan en lur comunicaziun als mieds da massa, mauncan tier las damas las favoritas pil tetel. Aschia ein la defensura dil tetel *Nanda Walliser* da Leissingen, *Emanuelle Zufferey* da Martigny che ha gudignau pliras ga il campiunadi svizzer sco era l'anteriura campionesa mundiala *Yael Margelisch* da Verbier buc alla partenza a Mustér. Per quei motiv seigi la concorrenza fetg aviarta, scrivan ils organisaturs. Ils campiunadis svizzers ein aviarts era per parasguladras e parasguladers digl'exteriur.

### Il vent savess far difficultads

Sill'emprema egliada paran las prognosas dall'aura per quest jamna d'esser bunas pil sport da parasgular. *Marc Demont* ch'ei commember dil comite d'organisaziun, relativescha denton quellas: «Nus stuein quintar cun fetg bia vent e gliez ei buc optimal. Quellas cundiziuns engrevieschan surtut la planisaziun dils tasks, pia ils sgols che fussen da far. Aschia ei quei in pensum fetg pretensius.» Muort il vent els aults sto vegnir planisau tasks pli cuorts e surtut era tals sin ina meins gronda altezia sur mar. Gest pervia da quellas cundiziuns dall'aura ein ils organisaturs lu era surstai dil grond diember d'annunziats. «135

parasguladras e parasguladers savein nus risguardar. Varga 120 ein s'annunziat. En vesta allas prognosas dall'aura ei quei in fetg legrivel diember», di Marc Demont. Ils campiunadis vegnan organisai dils Surselva Flaigers e dall'Uniu Disentis Open. Quella collaboraziun funcziuna excellentamein dapi biars onns. Danovamein segidan rodund 40 voluntarias e voluntaris vid il menaschi che cumpeglia ina concorrenza mintga di entochen sonda. La partenza allas concurrenz succeda danovamein a Gendusas el territori da skis da Mustér sin in'altezia da rodund 2200 meters sur mar. Loghens d'arrivada ufficials ein a Mustér/Sax, Trun e Glion.

## Ura da plaids – «Quei vi jeu era per romontsch!»

Cura che Giachen Caduff ha viu in'ura da plaids fatga sezza per dialect tudestg svizzer, ha el giu in'idea. Siu collega ha lura era animau el da far ina tala per romontsch. Detg e fatg, suenter pliras emprovas eisi reussiu ad el da construir in'ura per sursilvan.

RTR/FMR

«Jeu hai quitau: Quei ei cool, quei vi jeu era per romontsch», di *Giachen Caduff*. All'entschatta eisi mo stau in hobi. Sia famiglia ed era las visetas han schau plascher sia ura e perquei ha el lu construuiu ulteriuras. L'ura ei ina platta da metal cun bustabs. Ils bustabs che glischan indichesch an il temps actual.

### Grazia a presentaziun dapli reclama

Sin invit dils responsabels dil cuors d'emprender romontscha a Glion ha Giachen Caduff presentau siu project ad in publicum pli grond. Perquei hagi el lura creau ina pagina d'internet ed ina pagina sin las medias socialas. Mo buca per viver in di dil vender uras – lezza opziun seigi pauc realistica, di gl'um che habitescha cun sia famiglia a Glion. Per far la segira ha el schau examinar da duas personas independentas la situaziun puncto dretgs e patents e quellas han confirmau ch'ei seigi buca problematic.


Tochen uss hagi el era buca survegniu reclamaziuns per siu hobi, anzi biara glieud hagi plascher da quellas uras ed el sez era.

### Affinitad per electronica

El hagi empriu d'electricist ed hagi perquei era ina certa affinitad per tala tecnica, quei che seigi in avantatg. Ei seigi denton stau ina sfida da posiziunar ils bustabs leu nua ch'i drovi els per puder leger il temps. «Sco era tier autras caussas hai ei giu num: entscheiver – e sch'ei funcziunescha buc, entscheiver aunc ina gada da niev», raquenta Giachen Caduff. Unfs seigi el mai vegnius, cun quei ch'el hagi er buca mess sesez sur squetsch da temps. Per puder programmar l'ura drova ei ina applicaziun. Quella tala e lu aunc ils manuals ha el era translatau per romontsch – tut cun la finamira da crear in product romontsch. Quei ei reussiu ad el: Las uras da plaids san ins schizun cumprar en duas variantas – tenor la moda da dir dalla Foppa ni dalla Cadi.



Giachen Caduff en siu lavuratori nua ch'el ha construuiu l'ura da plaids.



L'emprema ura da plaids che Giachen Caduff ha fatg per sesez.



Per programmar quell'ura drovi ina applicaziun speciala ch'ei era per romontsch.

FOTOS RTR